

天津府志卷之二十七

人物志上

列傳創自龍門班馬繼軌後之秉筆蘭臺者相仍不改志乘為國之外史標序盛德昭紀鴻懿其體未嘗不同也津郡舊屬渤海人才代興雋鮑騰聲於天漢賈高揚烈於有唐降自元明懷文被質者史不絕書彬彬乎邦家之光矣

聖朝教化翔洽郡壤拱護

神京其間碩儒名彥觀化最近沐教亦最深百年以來後先接迹爰述其峻偉之績或表其一長之善

天津府志

卷之二十七

人物名臣

一

有媿必書義歸風勸閭里媯修之士觀感而興毋使曩哲之獨擅休聲於前也志人物

名臣

前漢

雋不疑

字曼倩渤海人治春秋為郡文學進退必

以禮名聞州郡武帝末郡國盜賊羣起暴勝之為直指使者衣繡衣持斧逐捕盜賊督課郡國東至海以軍興誅不從命者威振州郡勝之素聞不疑賢至渤海遣吏請與相見不疑冠進賢冠帶欄具劔佩環珖褒衣博帶盛服至問上謁勝之開閣延

請望見不疑容貌尊嚴衣冠甚偉躡履起迎登堂
坐定不疑據地曰竊伏海瀕聞暴公子威名舊矣
今乃承顏接辭凡爲吏太剛則折太柔則廢威行
施之以恩然後樹功揚名永終天祿勝之知不疑
非常人敬納其戒遂表薦不疑徵詣公車拜青州
刺史昭帝卽位齊孝王孫劉澤交結郡國豪傑謀
反欲先殺青州刺史不疑發覺收捕皆伏其辜擢
爲京兆尹賜錢百萬始元五年有一男子乘黃犢
車詣北關自謂衛太子公車以聞詔使公卿將軍
中二千石雜識視長安中吏民聚觀者數萬人右

天津府志

卷之二十七

人物
名臣

二

將軍勒兵闕下以備非常丞相御史中二千石至
者莫敢發言京兆尹不疑後到叱從吏收縛或曰
是非未可知且安之不疑曰諸君何患於衛太子
昔蒯瞶違命出奔輒拒而不納春秋是之衛太子
得罪先帝亡不卽死今來自詣此罪人也遂送詔
獄天子與大將軍霍光聞而嘉之曰公卿大臣當
用經術明於大義由是名聲重於朝廷在位者皆
自以爲不及也

前漢書
本傳

後漢

公孫進階

渤海人與扶風魏齊卿並危言深論

隱豪強自公卿以下莫不畏其貶議屣屣到門河間

志

苑康 字仲真渤海重合人注重合縣故城在今滄州樂陵縣東少

受業太學與郭林宗親善舉孝廉再遷潁陰令有

能跡遷泰山太守郡內豪姓多不法康至奮威怒

施嚴令莫有干犯者先所請奪人田宅皆遽還之

是時山陽張儉殺常侍侯覽母案其宗黨賓客或

有逃匿太山界者康既常疾鬪官因此皆窮相收

掩無得遺脫覽大怨之誣康與兗州刺史第五種

及都尉壺嘉詐上賊降徵康詣廷尉減死罪一等

天津府志

卷之二十七

人物名臣

三

徙日南潁陰人及太山羊陟等詣闕為訟乃原還

本郡卒於家後漢書本傳

三國魏

韓宣 字京然渤海人累官大鴻臚始南陽韓暨

以夙德在宣前為大鴻臚及宣在後亦稱職故時

人語曰大鴻臚小鴻臚前後治行曷相如魏略

南北朝

刁廕 字淑和渤海饒安人曾祖協從晉元帝度

江居京口位尚書令父暢晉右衛將軍初晉相劉

裕徵時負社錢一萬違時不還暢兄達說而徵焉

及誅桓 以嫌先誅刁氏靡與暢故吏遂奔姚興
爲太子中庶子及姚 滅與司馬休之等歸魏請
於南境自效明元假靡建威將軍靡於河濟間招
集流散傳檄邊境靡弟彌時亦率衆入京口親共
討裕裕頻遣兵破之明元南幸鄴靡朝於行宮明
元問曰縛劉裕者於卿親疎靡曰伯父帝笑曰劉
裕父子當應憚卿於是假靡鎮東將軍青州刺史
東光侯使別立義軍又詔靡令隨機立效靡於是
招集譙梁沛人五千餘家置二十七營遷鎮濟陰
遷徐州刺史賜爵東安伯後除薄骨律鎮將靡以

天津府志

卷之二十七

人物名臣

四

西土乏雨表求鑿渠溉公私田又奉詔以高平安
定統萬及薄骨律等四鎮出車牛五千乘運屯穀
五十萬斛付沃野以供軍糧道多深沙車牛艱阻
求於牽屯山河水之次造船水運又以所縮邊表
常懼不虞造城儲穀置兵備守詔皆從之詔卽名
此城爲刁公城以旌功焉皇興中靡與隴西王源
賀及中書監高允等並以耆年特見優禮錫靡几
杖劔履上殿月致珍羞焉靡性寬柔好尚文典手
不釋書明敏多智凡所爲詩賦論頌并諸雜文百
有餘篇又汎施愛士恬靜寡欲篤信佛道著教識

二十餘篇以訓子孫太和八年卒年九十五諡曰

簡子遵

北史本傳

刁遵 字奉國襲爵遵少不拘小節長更修改太

和中例降為侯嘗經篤疾幾死見有神明救之言

福門子當享長年後卒於洛州刺史諡曰惠侯子

楷早卒楷子冲

北史本傳

唐

高元裕 字景圭其先蓋渤海人第進士累辟節度

府以右補闕召道商州會方士趙歸真擅乘驛馬

元裕詆曰天子置驛爾敢疾驅邪命左右奪之還

天津府志

卷之二十七

人物名臣

五

具以聞敬宗視朝不時稍稍決事禁中宦豎恣放

大臣不得進見元裕諫曰今西頭勢乃重南衙樞

密之權過宰相帝頗悟而不能有所檢制人皆危

之俄換侍御史內供奉士始相賀李宗閔高其節

擢諫議大夫進中書舍人鄭注入翰林元裕當書

命乃言以醫術侍法愧憾及宗閔得罪元裕坐出

餞貶闈州刺史注死復授諫議大夫翰林侍講學

士莊恪太子立擇可輔導者乃兼賓客進御史中

丞卽建言紀綱地官屬須選有不稱職者請罷之

於是監察御史杜宣猷柳瓌崔郢侍御史魏中庸

高簡並奪職故事三司監院官帶御史者號外臺得察風俗舉不法元和申李夷簡因請按察本道州縣後益不職元裕請監察御史歷本臺得專督察詔可累擢尚書左丞領吏部選出爲宣歙觀察使入授吏部尚書拜山南東道節度使封渤海郡公奏蠲逋賦甚衆在鎮五年復以吏部尚書召卒於道年七十六贈尚書右僕射元裕性勤約通經術敏於爲吏巖巖有風采推重於時自侍講爲中丞文宗難其代元裕表言兄少逸才可任因以命之世榮其選少逸長慶末爲侍御史坐失舉劾

天津府志

卷之二十七

人物名臣

六

貶贊善大夫累遷諫議大夫乃代元裕稍進給事中出爲陝虢觀察使中人責峽石驛吏供以惡鞭之少逸封餅以聞宣宗怒召使者責曰山谷間是餅豈易具邪謫隸恭陵中人皆斂手以兵部尚書致仕卒元裕始名允中太和中改今名元裕子璩字瑩之第進士累佐使府以左拾遺爲翰林學士擢諫議大夫近世學士超省郎進官者惟鄭顥以尚主而璩以寵升云懿宗時拜劔南東川節度使召拜中書侍郎同中書門下平章事閱月卒贈司

空

唐書本傳

賈 耽 字敦詩滄州南皮人天寶中舉明經補臨
清尉上書論事徙太平河東節度使王恩禮署爲
度支判官累進汾州刺史治凡七年政有異績召
授鴻臚卿兼左右威遠營使俄爲山南西道節度
使梁崇義反東道耽進屯穀城取均州建中三年
徙東道德宗在梁耽使司馬樊澤奏事澤還耽大
置酒會諸將俄有急詔至以澤代耽召爲工部尚
書耽納詔於懷飲如故旣罷召澤曰詔以公見代
吾且治行敕將吏謁澤大將張獻甫曰天子播越
而行軍以公命問行在乃規旄鉞利公土地可謂

天津府志

卷之二十七

人物名臣

七

事人不忠矣請爲公殺之耽曰是何謂耶朝廷有
命卽爲帥矣吾今趨覲得以君俱乃行軍中遂安
俄爲東都留守故事居守不出城以耽善射優詔
許獵近郊遷義成節度使淄青李納雖削僞號而
陰蓄姦謀冀有以逞其兵數千自行營還道出滑
或請館於外耽曰與我鄰道奈何疑之使暴於野
命館城中宴廡下納士皆心服耽每畋從數百騎
往往入納境納大喜然畏其德不敢謀貞元九年
以尚書右僕射同中書門下平章事俄封魏國公
常以方鎮帥缺當自天子命之若謀之軍中則下

有背向人固不安帝然之不用也順宗立進檢校
司空左僕射時王叔文等干政耽病之屢移疾乞
骸骨不許卒年七十六贈太傅諡曰元靖耽嗜觀
書老益勤尤悉地理四方之人與使夷狄者見之
必從詢索風俗故天下地土區產山川夷岨必究
治之方吐蕃盛彊盜有隴西異時州縣遠近有司
不復傳耽乃繪布隴右山南九州且載河所經受
爲圖又以洮湟甘涼屯鎮額籍道里廣狹山險水
原爲別錄六篇河西戎之錄四篇上之詔賜幣馬
珍器又圖海內華夷廣三丈從三丈三尺以寸爲

天津府志

卷之二十七

人物
名臣

八

百里并撰古今郡國縣道四夷述其中國本之禹
貢外夷本班固漢書古郡國題以墨今州縣以朱
刊落疏舛多所釐正帝善之賜予加等或指圖問
其邦咸得其真又著貞元十道錄以貞觀分天下
隸十道在景雲爲按察開元爲採訪廢置升降備
焉至陰陽雜數罔不通其器恢然蓋長者也不喜
臧否人物爲相十三年雖安危大事亡所發明而
檢身厲行自其所長每歸第對賓客無少倦家人
近習不見其喜愠世謂淳德有常者

唐書
本傳

李 愚 字子晦渤海無棣人也愚爲人謹重寡言好學爲古文滄州節度使盧彥威以愚爲安陵主簿丁母憂解去後遊關中劉季述幽昭宗於東內愚以書說韓建使圖興復其言甚壯建不能用乃去之洛陽舉進士宏詞爲河南府叅軍白馬之禍愚復去之山東與李延光相善延光以經術事梁末帝爲侍講數稱薦愚愚由此得召久之拜左拾遺崇政院直學士衡王友諒末帝兄也梁大臣李振等皆拜之獨愚長揖末帝以責愚曰衡王朕拜之卿獨揖可乎愚曰陛下以家人禮見之則拜宜

也臣於王無所私豈宜妄有所屈坐言事忤旨罷爲鄧州觀察判官唐莊宗滅梁愚朝京師唐諸公卿素聞愚學古重之拜主客郎中翰林學士魏王繼岌伐蜀辟愚都統判官蜀道阻險議者以謂宜緩師待變而進招討使郭崇韜以決於愚愚曰王衍荒怠亂國之政其人厭之乘其倉卒擊其無備其利在速不可緩也崇韜以爲然而所至迎降遂以滅蜀初軍行至寶鷄招討判官陳乂稱疾請留愚厲聲曰陳乂見利則進知難則止今大軍涉險人心易搖正可斬之以徇由是軍中無敢言留者

明宗卽位累遷兵部侍郎承旨明宗祀天南郊愚
爲宰相馮道趙鳳草加恩制道鄙其辭罷爲太常
卿任園罷相乃拜愚中書侍郎同平章事愚爲相
不治第宅借延賓館以居愚有疾明宗遣宦官視
之見其敗氈弊席四壁蕭然明宗嗟嘆命以供帳
物賜之潞王反兵犯京師愍帝夜出奔明日愚與
馮道至端門聞帝已出而米 昭馮贇皆已死愚
欲至中書候太后進止道曰潞王已處處張榜招
安今卽至矣何暇候太后旨邪乃相與出迎廢帝
入立罷道出鎮同州以劉昫爲相昫性褊急而愚

天津府志

卷之二十七

人物
名臣

十

素剛介動輒違戾昫與馮道姻家愚素以此誚昫
兩人遂相誼詬乃俱罷愚守左僕射是時兵革方
興天下多事而愚爲相欲依古以創理乃請頒唐
六典示百司使各舉其職州縣貢士作鄉飲酒禮
時以其迂闊不用愍帝卽位有意於治數召學士
問以時事而以愚爲迂未嘗有所問清泰二年以

疾卒

五代史
本傳

宋

賈黃中

字媧民滄州南皮人唐相耽四世孫父珙

傳註

課其誦讀六歲舉童子科七歲能屬文觸類

賦詠父常令蔬食曰俟業成乃得食肉十五舉進士授校書郎集賢校理遷著作佐郎直史館建隆三年遷左拾遺歷左補闕開寶八年通判定州判太常禮院黃中多識典故每詳定禮文損益得中號爲稱職嶺南平以黃中爲採訪使廉直平恕遠人便之還奏利害數十事皆稱旨會克江表選知宣州歲饑民多爲盜黃中出已俸造糜粥賴全活者以千數仍設法弭盜因悉解去太宗卽位遷禮部員外郎太平興國二年知昇州時金陵初附黃中爲政簡易部內甚治一日案行府署中見一室

天津府志

卷之二十七

人物名臣

十一

扁鑰甚固命發視之得金寶數十匱計直數百萬乃李氏宮閣中遺物也卽表上之上覽表謂侍臣曰非黃中廉恪則亡國之寶將汙法而害人矣賜錢三十萬丁父憂起復視事五年召歸闕有薦黃中文學高第召試中書拜駕部員外郎知制誥八年與宋白呂蒙正等同知貢舉遷司封郎中充翰林學士雍熙二年又知貢舉俄掌吏部選端拱初加中書舍人二年兼史館修撰凡再典貢部多柬拔寒俊除擬官吏品藻精當淳化二年秋與李沆並拜給事中叅知政事太宗召見其母王氏命坐

謂曰教子如是真孟母矣作詩以賜之頒賜甚厚
黃中素重呂端爲人屬端出鎮襄陽黃中力薦於
上因留爲樞密直學士遂叅知政事當世文行之
士多黃中所薦引而未嘗言人莫之知也然畏慎
過甚中書政事頗留不決四年冬與沆並罷守本
官明年知襄州上言母老乞留京改知澶州辭曰
上戒之曰夫小心翼翼君臣皆當然若太過則失
大臣之體黃中頓首謝上因謂侍臣曰朕嘗念其
母有賢德母傳詳列女七十餘年未覺老每與之語甚
明敏黃中終日憂畏必先其母老矣因目叅知政

天津府志

卷之二十七

人物名臣

三

事蘇易簡曰易簡之母亦如之自古賢母不可多得易簡前謝曰陛下以孝治天下獎及人親臣實何人膺茲榮遇至道初黃中遭疾詔令歸闕會建儲宮擇大臣有德望者爲賓友黃中在選中以久疾改命李至李沆兼賓客黃中亦特拜禮部侍郎代至兼秘書監黃中素嗜文籍旣居內閣甚以爲慰二年以疾卒年五十六其母尚無恙卒如上言贈禮部尚書上聞其素貧別賜錢三十萬旣葬其母入謝又賜白金三百兩上謂之曰勿以諸孫爲念朕當不忘也黃中端謹能守家法廉白無私多

知臺閣故事談論亶亶聽者忘倦焉在翰林日太宗召見訪以時政得失黃中但言臣職典書詔思不出位軍國政事非臣所知上益重之以爲謹厚及知政事卒無所建明時論不之許有文集三十卷子守謙雍熙二年進士守正獻文召試賜進士第後爲虞部員外郎守約國子博士守文殿中丞守訥右贊善大夫

宋史本傳

索 湘 字巨川滄州鹽山人開寶六年進士釋褐鄆州司理叅軍齊州有大獄連逮者千五百人有司不能決湘受詔授鞫事隨以白太平興國四年

天津府志

卷之二十七

人物名臣

三

轉運使和峴薦其能遷太僕寺丞充度支巡官改太子右贊善大夫轉殿中丞充推官拜監察御史九年河決壞民田命與戶部推官元玘同按行會詔下東封與劉蟠同知泰山路轉運事又爲河北轉運副使湘經度供餽以能幹聞事集加屯田員外郎明年契丹入寇王師衄於君子館敵兵乘勝據中渡橋塞上門將趨鎮州諸將計議未定湘爲田重進畫謀結大陣東行聲言會高陽關兵敵以爲然卽擁衆邀我於平虜城夜二鼓率兵而南徑入鎮陽據唐河乘其無備破砦柵及敵兵覺悉遁

走雍熙中召爲鹽鐵判官改駕部員外郎端拱二年河北治方田命副樊知古爲招置營田使會議罷復爲河北轉運使轉虞部郎中選爲將作少監居無何有訟其擅易運絲以自用者坐授膳部員外郎知相州時有羣盜聚西山下謀斷澶州河橋入攻磁相州援旗伐鼓白晝抄劫鄰郡發兵千人捕逐無敢近湘擇州軍得精銳三百人偵其入境卽掩擊而盡擒之轉運使王嗣宗出狀聞詔復舊官命爲河東轉運使湘以忻州推官石宗道憲州錄事胡則爲幹職命以自隨所至州郡勾檢其簿

天津府志

卷之二十七

人物名臣

齒

領二人後皆歷清要明年王超等率師趨烏白池抵無定河水源涸絕軍士渴乏時湘已輦大鋏千枝至令鑿井衆賴以濟真宗卽位入爲右諫議大夫復充河北轉運使屬郡民有幹釀歲輸課甚微而不逞輩因之爲姦盜湘奏廢之德州舊賦民馬以給驛又役民爲步遞湘代以官馬兵卒人皆便之會內殿崇班閻自新建議請於靜戎威虜兩軍置場鬻茶收其利以資軍用湘言非便遂止又言事者請許權場商旅以茶藥等物販易於北界北界商旅許於雄霸州市易資其貿遷庶息邊患詔

湘詳議以聞乃上言曰北邊自興置權場商旅輻
奏制置深得其宜今若許其交相販易則沿邊商
人深入戎界竊爲非便又北界商人若至雄霸其
中或雜姦僞何由辨明况邊民易動難安蕃戎之
情宜爲羈制望且仍舊爲便會有詔規度復修定
州新樂蒲陰兩縣湘以其地迫窄非屯兵之所遂
奏罷之湘少文而長於吏事歷邊郡所至必廣儲
畜爲備豫計出入軍旅間頗著能名先是邊州置
權場與蕃夷互市而自京輦物貨以充之其中茶
茗最爲煩擾復道遠多損敗湘建議請許商賈緣

天津府志

卷之二十七

人物名臣

五

江載茶詣邊郡入中旣免道途之耗復有征算之
益又威虜靜戎軍歲燒緣邊草地以虞南牧言事
者又請於北砦山麓中興置銀冶湘以爲召寇亦
奏罷之咸平二年入爲戶部使受詔詳定三司編
敕坐與王扶交相請托擅易板籍責授將作少監
三年出知許州徙荆南復爲右諫議大夫知廣州
四年卒詔遣其子希顏護喪傳置歸鄉里宋史本傳
張知白 字用晦滄州清池人幼篤學中進士第累
遷河陽節度判官咸平奏疏言當今要務真宗異
之召試舍人院權右正言獻鳳展箴出知劍州逾

年召試中書加直史館面賜五品服判三司開拆
司江南旱與李防分路安撫及還權管勾京東轉
運使事周伯星見司天以瑞奏羣臣伏閣稱賀知
白以爲人君當修德應天而星之見伏無所繫因
陳治道之要帝謂宰臣曰知白可謂乃心朝廷矣
東封進右司諫又言咸平中河湟未平臣嘗請罷
郡國所上祥瑞今天下無事靈貺並至望以泰山
諸瑞圖寘玉清昭應宮其副藏秘閣陝西饑命按
巡之尋知鄧州會關右流傭至境知白旣發倉廩
又募民出粟以濟擢龍圖閣待制審官院再遷尚

書工部郎中使契丹知白以朝廷制官重內輕外
爲引唐李嶠議遷臺閣典藩郡乃自請補外不許
遂命糾察在京刑獄固請知青州還京師求領國
子監帝曰知白豈倦於處劇邪宰臣言知白更踐
中外未嘗爲身謀乃遷右諫議大夫擢御史中丞
拜給事中叅知政事郊禮成遷尚書工部侍郎時
同列王曾遷給事中猶班知白上知白心不能平
累表辭之曾亦固請列知白下乃加知白金紫光
祿大夫復爲給事中判禮儀院會罷還所辭名時
王欽若爲相知白論議多相失因稱疾辭位罷爲

刑部侍郎翰林侍讀學士知大名府及欽若分司
南京宰相丁謂素惡欽若徙知白南京留守意其
報怨既至待欽若加厚謂怒復徙知白亳州遷兵
部仁宗卽位進尚書右丞爲樞密副使以工部尚
書同中書門下平章事會靈觀使集賢殿大學士
時進士唱第賜中庸篇中書上其本乃命知白進
讀至修身治家之道必反復陳之知白在相位慎
名器無毫髮私常以盛滿爲戒雖顯貴其清約如
寒士然體素羸憂畏日侵在中書忽感風眩輿歸
第帝親問疾不能語薨爲罷上已宴贈太傅中書

天津府志

卷之二十七

人物名臣

七

令禮官謝絳議諡文節御史王嘉言知白守道徇
公當官不撓可謂正矣諡文正王曾曰文節美諡
矣遂不改知白九歲其父終邢州殯於佛寺及契
丹寇河北寺宇多頽廢殯不可辨知白旣登第徒
行訪之得佛寺殿基恍然識其處旣發其衣衾皆
可驗衆歎其誠孝嘗過陝州與通判孫何遇讀道
旁古碑凡數千言及還知白略無所遺天聖中契
丹大閱聲言獵幽州朝廷患之帝以問二府衆曰
備粟練師以備不虞知白曰不然契丹修好未遠
今其舉者以上初政試觀朝廷耳豈可自生覺耶

若終以爲疑莫如因今河決發兵以防河爲名復亦不虞也未幾契丹果罷去無子以兄子子思爲後仕至尚書工部侍郎致仕

宋史本傳

李之純 字端伯滄州無棣人登進士第熙寧中爲度支判官江西轉運副使御史周尹劾廣西提點刑獄許彥先受吏金命之純往究其端乃起於出婢之口之純以爲蕪俚之言不治彥先得免徙成都路轉運使成都歲發官米六千石損直與民言者謂惠民損上詔下其議之純曰蜀郡人恃此爲生百年奈何一旦奪之事遂已秩滿復留凡數歲

天津府志

卷之二十七

人物名臣

六

始還朝神宗勞之曰還方不欲數易太吏使劍外安靖年穀屢豐以彰朝廷綏遠之意汝知之乎以爲右司郎中轉太僕卿元祐初加直龍圖閣知滄州召爲戶部侍郎未至改集賢殿修撰河北都轉運使進寶文閣待制知瀛州俄以直學士知成都府還爲戶部三遷御史中丞建言朝廷事下六部但隨省吏視其前後批以制緩急之序是爲胥吏顯處命令也若大臣不暇省宜令列曹長貳隨其所承當行卽行當止卽止必稟而後決毋拘於文則吏不得舞權而下情達矣又言衆賢和於朝則

萬物和於野燮理陰陽輔相之職問者國論稍虧
雍睦語言播傳動係觀望不可以不謹董敦逸黃
慶基論蘇軾託詞命以毀先帝蘇轍以名器私所
親皆以監司罷之純疏其誣罔乃更黜之以疾改
工部尚書紹聖中劉拯劾其阿附轍出知單州卒
年七十五從弟之儀之儀傳詳文苑
宋史本傳

金

師安石 字子安清州人本姓尹氏避國諱更焉承
安五年詞賦進士爲人輕財尚義初補尚書省令
史適宣宗南遷留平章完顏承暉守燕都承暉將

天津府志

卷之二十七

人物
名臣

九

就死以遺衆託安石使赴行在安石間道走汴以
聞上嘉之擢爲樞密院經歷官時哀宗在春宮領
樞密院事遂見知遇元光二年累遷御史中丞其
七月上章言備禦二事其一曰自古所以安國家
息禍亂不過戰守避和四者而已爲今之計守和
爲上所謂守者必求智謀之士使內足以得戍卒
之心外足以挫敵人之銳不惟彼不能攻又可以
伺其隙而敗之其所謂和則漢唐之君固嘗用此
策矣豈獨今日不可用乎乞令有司詳議而行其
二曰今敵中來歸者頗多宜豐其糧餉厚其接遇

度彼果肯爲我用則擇有心力者數十人潛往以誘致其餘來者既衆彼必轉相猜貳然後徐起而圖之則中興之功不遠矣上嘉納之九月坐劾英王守純附奏不實決杖追官及哀宗卽位正大元年擢爲同僉樞密院事二年復御史中丞三年工部尚書權左叅政四年進尚書右丞五年臺諫劾近侍張文壽張仁壽李麟之安石亦論列三人不已上怒甚有旨謂安石曰汝便承取賢相朕爲昏主止矣如是數百言安石驟蒙任用連遭摧折疽發腦而死上甚悼惜之

金史本傳

天津府志

卷之二十七

人物名臣

三

陳 尙 字和之滄州人大安元年進士天興間官右司諫遇事輒言無所隱上嘗面獎及汴京被兵屢上封事言得失請戰一書尤爲剴切其略云今日之事皆出陛下不斷將相怯懦若因循不決一旦無如之何恐君臣相對涕泣而已可謂切中時疾而時相亦蓋合喜等沮之策爲不行識者惜焉

金史許古傳

云

劉 正 字清卿清州人年十五知讀書習吏事初辟制國用使司令史遷尚書戶部令史至元八年

罷諸路轉運司立局考核逋欠正掌其事大都運司負課銀五百四十七錠逮繫倪運使等四人徵之視本路歲入簿籍實無所負辭久不決正察其寃遍閱吏牘得至元五年李介甫關領課銀文契七紙適合其數驗其字畫皆司庫辛德柔所書也辛貧窘時已富貴交結權貴莫敢誰何正廉得其實始白尚書捕鞠之悉得課銀辛旣伏辜而四人得釋正由是知名轉樞密院令史辟掾中書十四年分省上都會諸王昔里吉叛至居庸關守者告前有警急使姑退正曰職當進而弗往後至者益

怯矣馳出關至上都邊將請黃白金符充戰賞主者告乏中書檄工部造給之後帝以爲欺罔欲詰治正曰軍賞貴速先造符印而後稟命豈不可乎帝釋之十五年擢左司都事時阿合馬當國與江淮行省阿里伯崔斌有隙誣以盜官糧四十萬命刑部尚書李子忠與正馳驛往按其事獄弗具阿合馬復遣北京行省叅知政事張澍等四人雜治之竟寘二人於死正乃移疾還家十八年徵爲左司員外郎十九年春阿合馬併中書左右司爲一遂爲左右司員外郎三月阿合馬敗火魯霍孫爲

右丞相復爲左司員外郎謁告歸九月中書傳旨
捕正與叅政咱喜魯丁等偕至帝前問曰汝等皆
黨於阿合馬能無禁乎正曰臣未嘗阿附惟法自
從耳會日暮車駕還內俱械繫於闕東隙地踰數
日姦黨多伏誅復械繫正於拱衛司火魯霍孫曰
上嘗謂劉正衣白衣行炭穴十年可謂廉潔者乃
免歸二十年春樞密院奏爲經歷陞叅議樞密院
事二十五年桑哥旣立尚書省擢爲戶部侍郎陞
戶部尚書嘗舉覈河間鹽運官虧課事幾陷於罪
乃移疾歸二十八年桑哥敗完澤爲丞相復擢爲

天津府志

卷之二十七

人物名臣

三

戶部尚書陞叅議尚書省罷仍叅議中書省事湖
南馬宣慰庶子因爭蔭不得誣告其兄匿亡宋官
金正知其誣罪之仍官其兄濟南張同知子求爲
兩淮運使正知其不稱弗與張遂作飛語構其事
帝召正詰之曰匿金事在右司爭蔭事在左司叅
議乃幕長寢右而舉左寧無私乎正辨析甚明事
遂釋三十年御史臺奏爲侍御史中書省奏爲吏
部尚書已而復留爲侍御史遷江南行御史臺中
丞大德元年改同僉樞密院事尋出爲雲南行中
書省左丞右丞忙兀突魯迷失請徵緬正以爲不

可俄俱被徵又極言其不可不從師果無功雲南民歲輸金銀近中慶城邑戶口則詭稱逃亡旬寨遠者季秋則遣官領兵往徵人馬芻糧往返之費歲以萬計所差官必重賂省臣乃得遣徵收金銀之數必十加二而折閱之數又如之其送迎饋贐亦如納官之數所遣者又以銅雜銀中納官正首疏其弊給官秤俾土官身詣官輸納其弊始革始至官儲貳二百七十萬索白銀百錠比四年得貳一千七十萬索金百錠銀三千錠七年秋還清州八年六月以左丞行省江西冬十月改江浙武宗

天津府志

卷之二十七

人物各臣

三

卽位召爲中書左丞陞右丞二年立尚書省懇辭還家仁宗卽位召諸老臣入議國事正詣闕言八事一曰守成憲二曰重省臺三曰辨邪正四曰貴名爵五曰正官符六曰開言路七曰慎賞罰八曰節財用會行赦改元集議行之仁宗初政風動天下正與諸老臣陳贊之力居多累乞致仕不許拜榮祿大夫平章政事議中書省事時議經理河南淮浙江西民田增茶鹽課額正極言不可弗從大旱歲野無麥穀種不入土臺臣言燮理非其人茲邗蒙蔽民多冤滯感傷和氣所致有旨會議平章

李孟曰燮理之責儒臣獨孟一人請避賢路平章
忽都不丁曰臺臣不能明察奸邪臧否時政可還
詰之正言臺省一家當同心獻替擇善而行豈容
分異耶孟搖首竟如忽都不丁言右丞相帖木迭
兒傳旨廉訪司權太重故按事失實自今不許專
決六品以下官平意忽都不丁李孟將議行之正
言但當擇人法不可易也事遂寢延祐六年卒後
贈宣力贊治功臣光祿大夫司徒柱國趙國公諡
忠宣子秉德官秘書監承歷兵工二部侍郎出爲
安慶路總管秉仁以蔭爲中書架閣管勾累官工

天津府志

卷之二十七

人物
各臣

三

部尚書致仕

元史
本傳

陳

顥

字仲明其先居盧龍有名山者仕金爲謀

克監軍太祖得之以爲平陽等路軍民都元帥子

孫從清州遂爲清州人顥幼穎悟日記誦千百言

稍長游京師登翰林承旨王磐安藏之門磐熟金

典章安藏通諸國語顥兼習之安藏乃薦顥入宿

衛尋爲仁宗潛邸說書於是仁宗奉母后出居懷

慶顥從行日開陳以古聖賢居艱貞之道會成宗

崩仁宗入定內難以迎武宗顥皆預謀及仁宗卽

位以推戴舊勳特拜集賢大學士榮祿大夫仍宿

衛禁中政事無不與聞科舉之行顥贊助之力尤多顥時伺帝燕閒輒取聖經所載大經大法有切治體者陳之每見嘉納帝嘗坐便殿羣臣入奏事望見顥喜曰陳仲明在列所奏必善事矣顥以父年老力請歸養清州帝特命顥長子孝伯爲知州以就養顥固辭乃以孝伯爲州判官帝欲用顥爲中書平章政事顥叩首謝曰臣無汗馬之功又乏經濟之略一旦寘之政塗徒速臣咎臣願得朝夕左右獻替可否庶少裨萬一亦以全臣愚忠帝乃允仁宗崩辭祿家居者十年文宗卽位復起爲集

天津府志

卷之二十七

人物名臣

五

賢大學士上疏勸帝大興文治增國子學弟子員蠲儒徭役文宗皆嘉納焉顥先後居集賢署薦士牘累數百有訐之者號曰吾寧以謬舉受罰蔽賢誠所不忍順帝元統初顥扈蹕行幸上都至龍虎臺帝命造膝前而握其手曰卿累朝老臣更事多矣凡議政事宜極言無隱顥頓首謝不敏顥每集議其言無不剴切後至元四年致政命食全俸於家明年卒年七十六至正十四年贈摠誠秉義佐理功臣光祿大夫河南江北等處行中書省平章政事杜國追封薊國公諡文忠顥出入禁闈數十

年樂談人善而惡聞人過大夫士因其薦拔以至顯列有終身莫知所自者是以結知人主上下無有惡尤毆陽玄爲國子祭酒與顯同考試國子伴讀每出一卷顯必拾而觀之苟得其片言之善卽以寘選列爲之色喜玄歎曰陳公之心蓋篤於仁而踰於厚者真可使鄙夫寬薄夫敦矣次子敬伯至正中仕爲中書叅知政事歷左丞右丞二十七年拜中書平章政事

元史本傳

明

王 翽

鹽山人先世農夫也王翽而列古學問中

天津府志

卷之二十七

人物名臣

三

永樂十三年進士成祖定都北京欲得北士爲重而開榜北士每後翽兩試皆高等上喜召見賜之食改庶吉士授大理寺正以註誤左遷行人宣德元年以楊士奇薦陞監察御史十年陞僉都御史鎮守江西移鎮松潘靖商巴之亂正統七年遼東兵變勅翽提督明年陞右副都御史留撫之十四年以邊功遷左都御史景泰三年召還加太子太保會兩廣有蠻寇議置總督而難其人兵部尚書于謙曰非王翽不可遂以命之明年蠻平召還其年夏陞吏部尚書翽爲人剛明果斷外強中寬論

事質確而亦善行其志其征四川番賊番酋有來
降者翽出所賜金幣易牛酒犒賞之曰此吾行時
上所陞賜天物也吾不敢用以賜汝等諸番皆悅
盡邀他部來歸初至遼東總兵以下途謁翽數責
其賊至不力戰曳出斬之皆捨地自伏請今願死
於是莫不盡力已出行邊高墻垣深溝塹自山海
關直抵開原屯堡斥堠千里相望益簡卒伍賑貧
窮偶配鰥寡凡詞訟無論輕重悉聽入贖雖至殺
人亦許之曰償死罪無益死者家而財或足濟其
用其他雜罪許其入贖足賑邊矣且夫邊民固不

可以法一也以死救生未爲不可也翽前後貯金
銀布帛穀粟物畜以數十萬邊計大充士皆騰飽
樂戰遂出塞破敵屢有膚功邊外嘗猝至下令壘
壘伺怠擊之皆遁去近邊諸來欵者去防老少男
婦靡不畏威召還時諸番詣闕乞留及至總督兩
廣威望已著蠻夷聞翽來皆恐謝曰蠻夷撫捕各
有機宜今當安之耳引其酋長犒以金帛酒食推
誠撫諭歸順甚多爲吏部尚書黜陟精嚴關節不
到有一女嫁賈傑傑官畿內翽妻愛女數使迎之
傑固志不遣曰翁方長銓拔擢人加膝耳官我京

師女朝夕見母何待迎耶女言翱妻爲翱置酒長
跪翱大怒取案上器擊傷之出宿朝房卒不調傑
生平所引用文武大吏若施聚焦禮范信耿九疇
軒輓年富李秉程信皆適世用馬昂崔恭列位六
卿翱直名呼之英宗復辟李賢坐事黜補外任翱
方言賢才得復留內閣益見倚任上進退大臣時
時召翱便殿面質可否呼翱老王而不名天順間
曹欽反夜執李賢傷其首血流被面賢奔翱所求
救賊并執翱翱厲聲曰朝廷何負汝汝反耶殺他
人寧殺我賊謝曰豈敢殺長者遂上馬去賢乃得

天津府志

卷之二十七

人物名臣

三

免事聞加太子少保時年七十有八上老翱難其
代也憲宗卽位命雨雪免朝叅仲孫以廕補國子
不使應試曰汝自有階毋妨寒士有中貴人遺明
珠數顆直可千金翱固辭不得則掇珠衣領閑居
數年中貴死召猶子還之詔營地於鹽山有司承
媚多列屋若干翱曰非詔旨也悉拆去成化三年
疾甚予告方輿疾出關病革遂卒年八十四贈太
保諡忠肅李文達稱之曰臯陶言九德王公有其
五矣亂而敬擾而毅簡而廉剛而塞強而義又曰
王公凡處事則無滲漏世稱信然

畿輔人物志

馬昂字景高其先河南祥符人後移籍河間之滄州永樂癸卯登鄉薦明年會試下第入國子監宣德丙午以儀容俊偉聲音宏亮授行在鴻臚寺序班正統丁巳用廷臣薦陞監察御史奉命整飭宣府大同偏頭關兵備及巡按陝西淮揚徽州等處所至有聲癸亥行在刑部獄禁失嚴囚因劫獄逃竄尚書以下咸禁錮跡捕乃陞昂右侍郎未幾改右副都御史叅贊甘肅軍務時叅贊都督王喜玩寇失機昂至劾其罪謫戍遼東官軍畏服先是赤斤蒙古罕東等衛番族恣肆鈔掠至強劫總兵

天津府志

卷之二十七

人物名臣

五

進貢馬駝昂受命帥將士討之盡得主名梟示及擒其僞祁王鎖南奔并妻子械送京師自是番人不敢近邊巳巳北虜寇甘州昂令人畜悉入城堡簡精銳選騎射躬擐甲冒出屯山隘以伺虜聞遁去西邊方倚爲長城而昂以乞疾忤旨乃命致仕景泰庚午也甲戌兩廣夷寇擾攘起昂總督兩廣軍務兼巡撫便宜行事昂乃大布朝廷威德帥總兵方岳并土官兵民剿其爲暴害者生致其僞將軍周鐵盛盤等獻闕下上遣行人勞以綵幣寶鈔陞右都御史丙子徵斗峒賊平轉左都御史天順

丁丑有不足昂者造謗上命致仕及入見復留命之山西巡察邊境北還遂理院事戊寅陞兵部尚書辛巳虜寇陝西勢甚急命懷寧伯孫鏜爲總兵昂仍總督刻日出師是夕曹欽反昂與鏜討之欽伏誅進太子少保仍掌兵事自是上寵待特厚賞賚以金玉束帶繡金麒麟服其銀幣玩器書畫禽鳥時鮮之賜歲無虛月衣有號撒哈喇者雖勲戚有不可得昂與賜焉屢召遊西苑南宮及扈從校獵南海子一時進退廷臣亦必召昂咨訪甲申憲宗嗣位信任益篤調戶部尚書尋奉勅同右都御

天津府志

卷之二十七

人物名臣

三

史林聰給事中潘禮陳越按籍點軍士既畢乃分精銳者爲十二營以備調用又籍軍帥之賢否而黜陟之慮後事之違變而禁約之實皆出其議云戊子昂年七十時有災異謫見力求退避得俞旨賜勅榮之陛辭復賜讌餞并寶鈔若干旣歸八年卒訃聞上嗟悼贈少保諡恭襄

分省人物考

強珍 字廷貴滄州人成化丙戌進士初知涇縣

奏減賦額人爲立祠擢御史負氣敢言嘗按甘肅及江北諸府人凜然畏之按遼東會權闖汪直挑釁償事時無敢論者珍獨上其罪下詔獄撻辱備

至謫戍遼東三年有旨復職致仕 治初起爲山東按察司副使未幾陞大理少卿遷右僉都御史巡撫宣府坐言官論列召還改南京右通政以母老乞歸 治十八年八月卒珍性強鯁政尚嚴刻所至有風采爲時所重

同上

徐廷錫 字天祿號拙菴南皮人成化庚子舉人令

博興涉縣二縣俱有能名擢太僕寺丞尋遷南京戶部主事監稅淮安慎於出納再遷郎中經理財賦纖細無遺爲大司農所嘉獎陞陝西叅議歸居數月卒廷錫性耿介孝友著於家庭所在無不以

天津府志

卷之二十七

人物名臣

三

清正稱祀鄉賢曾孫升階

南皮縣志

張 淮 號寒泉南皮人性稟剛毅廉潔忠直朝野

咸想見其丰裁幼時慮聞見寡陋就學京師業大進正德戊辰成進士授戶部主事尋改監察御史簪筆觸邪嘗彈大司馬大中丞京兆尹不法事毫無顧忌士論壯之巡鹽兩淮按部中州所至惟旌廉退污剗弊抑強憲紀爲之肅清武宗嬖宦秦文者餽以厚幣力却之會上出畋諸大臣莫敢發言淮獨抗疏極諫致上震怒仍犯顏無懼色既遷浙江憲副以禦逆寧功有白金文綺之錫嘉靖改元

晉河南按察使盆窺頓雪干請不行稱明允焉丁
艱歸遂臥里門數年卒同上

鄭 氣 字浩然靜海人中正德庚午鄉試甲戌進
士授涇縣知縣裁決如流報最民立生祠祀之陞
監察御史尋擢河南按察使陞右布政尋轉陝西
左布政使方氣為侍御時靜海地濶貴戚多侵占
氣設方略收復之又民間寄牧稱累氣白於當事
減其七民賴以蘇舊派役有青衣夫不勝擾害方
為邑侯言罷之氣天性仁愛不遺故舊自治甚嚴
而待人有禮沒祀鄉賢靜海縣志

天津府志

卷之二十七

人物名臣

三

戴 才 字子需滄州人登嘉靖甲辰進士授行人
擢給事中庚戌之秋邊烽達於京師倉卒乏軍興
戶部請一切加諸逋賦才抗疏言今畿輔山陝都
郡歲苦兵騷驛不堪而復議增馬江南諸郡每先
期輸納料銀又豫輸機兵民快皆目前權宜之計
而復議增賦是竭澤而漁以重困民也部議竟格
不行累陞兵科都給事中南京太僕寺少卿其後
以僉都御史巡撫甘肅又以副都御史巡撫陝西
又以右都御史總督陝西三邊軍務才三蒞西邊
諳練其利弊墾荒田興水利簡兵將飭烽堠邊外

諸羌輕入輒遭創去朝廷倚爲長城而其績最著者中衛南有裴家川地腴田可萬頃民苦邊騎不得田作才相度地形築墻建堡疏於朝且請以固原守備將兵營田以苑馬少卿兼僉事移靖虜整飭兵餉而秦隴之間屹成巨鎮又俺荅欵關乞貢示報可而吉能者俺荅支屬也援例以請下才議才言邊外東西各爲雄長授職宜均通貢宜隨俺酋盡入爲便互市第可行之宜大不可槩陝西也時內有重臣主其議者才拂之而不顧也當其爭互市時或有勸才稍徇貴人意者才正色曰市之

天津府志

卷之二十七

人物名臣

三

利害籌之熟矣狗下而謾上便身圖而不計國是有臣如此將安用之卒不肯附和內意才旣去鎮卒開甘肅之市令番夷交惡爲國家生一邊隙人歎才之遠見及晉南本兵按江防緩急爲飭兵卒部屬方略有巡鹽御史奏改浦子口五衛隸御史才抗疏言南畿各衛分列六營以藩籬根本統領則以內外守備巡視則以科道其來已久一旦改隸御史使堂堂六師下同部伍非建制意也事遂寢人謂才得人體萬 丙戌卒年七十有三

志

幾輔人物

陳 燿 字德孚靜海人嘉靖乙酉舉於鄉弱冠未
婚明年登進士生而穎異十歲工文日記數千言
爲文暢朗有古氣歷陞刑部員外郎中勘斷明決
尚書唐龍常謂諸司曰獄必經陳郎中手無枉縱
也恤刑河南數十年疑獄一語立剖老吏吐舌以
神明呼之太宰張孚敬兼經筵重燿文學令編摩
進講語錄燿多用諷諫語尋陞湖廣副使復除冀
南兵備以誑誤謫萊州府同知復累陞山西督糧
叅政時邊餉缺乏燿轉運有方不至告匱再陞河
南按察使政簡刑清汴民爲之謠曰前有鄭廉後

天津府志

卷之二十七

人物名臣

三

有陳廉同起靜海並清中原曾推大同巡撫僉都

御史 靜海縣志

張 愚 天津人嘉靖壬辰進士除戶部主事歷陞

都察院右副都御史賦性剛直蒞政明敏巡撫延

綏嚴飭戎務欽賜蟒玉以勞瘝卒官賜諭祭蔭一

子 天津衛志

劉 燾 天津人嘉靖戊戌進士授濟南府推官歷

陞都察院左都御史兼兵部左侍郎修河防立義

塚所至皆有惠聲屢疏求返家居惟以畊讀課子

弟生平撰述極多所著有奏議等若干卷行世子

維城維垣維埔同

湯 賓 字繼寅號交川上世為齋安人有遠祖徙

順義永樂間曾祖福春者始卜南皮而家焉賓方

孕時其父父名殷傳詳義行夢一少年鼻笏入戶賓遂生

父通星學知賓大貴賓自幼穎敏殊凡兒書口授

輒成誦屬對應聲而答皆奇麗驚人五歲時忽向

父前朗誦大學康誥章益奇之已而其父授吳江

丞賓時八歲隨侍行道里二千而遙中所經行山

川郡邑水陸交際下極媿瑣一一能舉其詳後治

舉子業有名嘉靖庚子舉順天鄉試至庚戌成進

天津府志

卷之二十七

人物名臣

三

士母病篤賓侍湯藥目不承睫衣不解帶者逾月

晝夜焚香籲天願以身代而母病竟瘳人以爲孝

感云初授安福知縣潔已愛民劑量里甲其他平

反疑獄保障流寇諸政事原本經術士民戴之越

三年轉戶部主事初權崇文門稅再巡通州草場

三轉邊鎮糧餉四督淮安倉政所至以勤廉著聲

尋轉員外郎中知萊州府事甫一歲而丁內艱服

闕補常州府常州爲東吳劇郡巨室大猾陰持官

府差繁賦重弊竇萬端賓明以察之寬以劑之竟

用治行高第擢湖廣按察司副使兵備蘇松蓋吳

人不能一日去賓也時當島夷兵燹之際賓外捍
海岸內安黎庶其時開府大吏不問人情徑裁兵
餉沿海無賴偶語市中謀鼓譟地方洶洶大吏聞
之倉皇無措賓立召幕下開誠告戒許以括帑金
爲餉而諸黨叩頭散去是年挑七府塘百里白茅
河百二十里度地程工胼胝爲勞其心獨苦先是
賓父丞吳江時曾濬白茅工未竟而賓卒成之人
羨其父子有德於吳如此庚午轉河南按察使便
道省親上九十壽鄉里以爲榮辛未轉湖廣右布
政使無何再進左癸酉擢撫治鄖陽右副都御史

天津府志

卷之二十七

人物名臣

三

賓領節抵鎮稽察山寇招撫流移軍政修明地方
寧謐俄以外艱歸幾不欲生至乙亥以中讒言致
仕賓既襄大事橐裝如洗日惟課農教子凡大夫
有司之干旄並皆謝絕暇或羣一二耆宿共話桑
麻賓儀貌修偉內無城府與物甚和而介然之守
萬夫難奪萬 十三年卒年七十二歲

分省人物考

張

謚

字子靜南皮人

傳詳儒林

曾孫也才識超羣

年十五補博士弟子嘉靖丙午舉於鄉丁未成進
士初任杭州推官治獄多所平反陞南京戶部主
事歷員外郎中俱以清理財賦見稱晉僉事備兵

武定值盜蜂起賊首楊思仁輩尤劇謚捕獲無遺
撫臣奏其功加俸一級遷山西右叅議瀕行以贖
緩萬餘金報之撫按毫不入已橐人服其操抵寧
武防禦有功事聞錫白銀二十兩聞宮殿災捐俸
助工陞陝西憲副整飭軍務規畫糧餉事事中窾
時京營協理戎政缺廷議推謚副會忤於當路乞
歸穆宗初薦不起卒年七十九謚偉貌白哲顧盼
有威見者敬畏事親孝居官廉所歷政蹟赫奕弟
子以輿傳曾孫永吉明經傳詳永譽保寧府經歷
並詳文苑永清太學生南皮縣志

天津府志

卷之二十七

人物名臣

三

張問之 字子審慶雲人嘉靖壬午舉人癸未進士
初授行人轉司副嘗上疏諫議章聖皇太后尊號
見明倫大典歷工部員外遷郎中奉命督造蘇州
府花輓工料工成還奏燒造艱辛諸狀會爲圖畫
貼說以進上嘉之酌定輓價密民賴安後督建九
廟皆有懋績擢湖廣叅議閱三載轉四川按察司
副使整飭威茂等處簡練士馬支繚埃墩斬龍洞
諸羌數百級撫按移檄燕凱奏疏賜金帛以旌其

功慶雲縣志

張簡 字易從靜海人嘉靖戊午舉人隆慶戊辰

進士仕大同推官以治行召拜監察御史代巡江
右分寧清安間多盜藪公移檄勦之民賴以安移
節中州中州人德之如江右焉還奏適大計吏公
掌首道條疏七事擢大理寺丞晉右少卿未幾爲
言事者所中遂歸公修髯偉貌幼時警敏強記於
星 卜筮諸書靡不究覽著述半逸不傳靜海縣志
李日茂 青縣人萬 丙戌科進士授武陟知縣善
政纍纍擢御史離任時泣送者數千人立朝多所
建白如諫三王並封疏其一也有中山文集行世
居鄉拳拳地方利弊如草場減徵先具揭上臺題

天津府志

卷之二十七

人物名臣

三

奏合邑立樂只祠祀之從祀鄉賢

河間府志

默 字中象靜海人萬 戊午科舉人己未進

士任河南懷慶府推官行取吏科給事中尋以不
附逆當回籍崇禎時復起爲吏科給事中時有巨
奸陳雲漢假名屯田增賦害民合縣束手無策默
獨經畫多方以紓其害勞怨不恤士民尸祝歷太
常旋推河南巡撫清忠亮節公舉崇祀鄉賢靜海縣志

國朝

高爾儼 字中孚靜海人明崇禎進士及第授翰林
院編修入

國朝累遷吏部尚書 文院大學士爾儼秉銓四載奉
公守法時論歸之所著有西銘行義孝經釋略諸
書卒贈少保謚文端

按前代人物採之正史諸書及各舊志皆詳注所
出

國朝人物新增者除墓銘傳略外係本州縣公舉事實
冊不復臚列分注以別於舊志云

勵杜訥 字近公其先浙江人祖遷靜海遂家焉
杜訥年十九為諸生學問淵通尤工書法以繕寫

世祖實錄敘勞除福寧州同知未赴

賜食六品俸入直

內廷尋舉博學宏詞授翰林院編修累遷刑部右侍郎

天津府志

卷之二十七

人物名臣

三

出入

禁闈二十餘年小心慎密前後疏奏多所建白居憲職
詳讞刑獄無所瞻徇卒謚文恪雍正九年追 贈

禮部尚書祀賢良祠

衛 璪

字文漪號慎齋其傑長子

其傑傳詳義行

以鄉貢

充滿洲教習得上考授富順令蜀自張獻忠蹂躪
後荒涼滿目璪至以招集流亡為已任出私財築
城郭葺廨宇立衢巷建學校繕樓櫓列津梁百事
具舉民多楚豫人善訟璪以至誠相格有難決者
立剖之縣人號為神君暇則訓飭生徒敦崇實行

政成授台州同知會

朝廷遣穆旦金世榮會督臣勦玉環山寇玉環孤峙海中難以率服璪身入巢穴招撫之竟不煩一兵上
官嘉其能劇事皆委於璪璪亦立辦無少滯嘉興
嘉善秀水三邑舊有鉗田一區互相爭訟無寧歲
璪三分之積訟永息

聖祖南巡得璪政績

賜詩扇綾匾羚羊貂皮等物

特詔加一級擢延建邵道

張文炳 字虎別滄州人明尚書縉之七世孫登順

天津府志

卷之二十七

人物各臣

四

治丙戌進士歷官中書舍人江西道監察御史嶺
南道叅政在朝有直聲歸里後專事著作請業者

無虛日子延緒以文學著

延緒傳詳義行

劉若鼐 字爾梅號敬菴父自山西來滄遂家焉中

康熙壬子舉人授新城教諭擢長壽令行取工部

主事陞監察御史山西巡撫噶禮為民害若鼐密

訪其實奏之

聖祖嘉其敢言授貴東叅議時都勻苗拒命若鼐輕騎諭

之即日歸順又三江苗叛若鼐至苗率其衆拜於

馬首在黔六年政成引

見時藹禮已於他事改

聖祖益重若鷲稱之曰劉鬚子授光祿少卿遷順天府丞

校試武闈授大理少卿旋以校試武闈勞瘁卒

勵廷儀 字南湖杜訥子由康熙庚辰進士入翰林

父子相繼直

內廷二十餘年誠敬慎密

聖祖仁皇帝有學問既優人品亦好之

百累遷內閣學士兼禮部侍郎

世宗憲皇帝御極授翰林掌院學士一切大典多所贊勸

累遷刑部尚書十年咸推明允

天津府志

卷之二十七

人物名臣

望

御書矜慎平恕賜額褒之并有忠誠宣猷協贊朕躬之

旨加太子少傅晉吏部尚書仍掌司寇前後陳奏悉關

大體遇事無鉅細一本小心而廷議侃侃不避怨

不辭勞公直自矢與人交胸無城府每薦引士類

惟賢與能年六十四卒祭葬如例奉

特恩加祭一次諡文恭

忠臣

前漢

鮑宣 字子都渤海高城人好學明經哀帝初大

司空何武除為西曹掾甚敬重焉薦為諫大夫遷

豫州牧宣居位常上書諫爭其言少文多實是時
丁傳子弟並進董賢貴幸宣每諫上納之尋改司
隸校尉後坐拒閉使者下廷尉獄博士弟子濟南
王咸舉幡太學下曰欲救鮑司隸者會此下諸生
會者千餘人又守闕上書遂減死一等髡鉗宣既
被刑乃徙之上黨字于長子平帝卽位王莽秉政
以法誅諸豪傑及漢忠臣不附已者宣及何武等
皆死前漢書本傳

天津府志

卷之二十七

人物忠臣

望

晉

刁協字亮渤海饒安人也祖恭魏齊郡太守

父攸武帝時御史中丞協少好經籍博聞強記釋

褐濮陽王文學累轉太常博士本郡大中正成都

王穎請爲平北司馬後歷趙王倫相國叅軍長沙

王又驃騎司馬及東嬴公騰鎮臨漳以協爲長史

轉潁川太守永嘉初爲河南尹未拜避難渡江元

帝以爲鎮東軍諮祭酒轉長史愍帝卽位徵爲御

史中丞例不行元帝爲丞相以協爲左長史中興

建拜尚書左僕射於時朝廷草創憲章未立朝臣

無習舊儀者協久在中朝諳練舊事凡所制度皆稟於協焉深爲當時所稱許太興初遷尚書令在職數年加金紫光祿大夫令如故協性剛悍與物無忤每崇上抑下故爲王氏所疾然悉力盡心志在匡救帝甚信任之及王敦構逆上疏罪協帝使協出督六軍旣而王師敗績協與劉隗俱侍帝於太極東除帝執協隗手流涕嗚咽勸令避禍協曰臣當守死不敢有貳帝曰今事逼矣安可不行乃令給協隗八馬使自爲計協年老不堪騎乘爲人所殺送首於敦敦聽刁氏收葬之帝痛協不免密

夫津府志

卷之二十七

人物忠臣

望

捕送協首者而誅之敦平後周顛戴若思等皆被顯贈惟協以出奔不在其例咸康中協子彝上疏訟之時庾冰輔政左光祿大夫蔡謨與冰書請加褒贈於是追復本官祭以太牢

晉書本傳

唐

高

沐

渤海人父馮事宣武李靈耀假守曹州靈

耀反馮密遣人奏賊纖悉有詔卽拜曹州刺史會李正巳盜有曹濮馮不能自通朝廷死官下沐貞元中擢進士第以家託鄆故李師古辟署判官師道叛沐率其僚郭昉郭航李公度引古今成敗前

後鑄說不能入師道所厚吏李文會林英等乘間
訴曰比悉心憂公家事而為沐等所疾公奈何舉
十二州地成沐輩千載名乎由是疏斥沐令守濮
州沐上書盛夸山東煮海之饒得其地可以富國
師道謀皆露後英奏事京師脅邸吏言沐以誠款
結天子師道怒誅沐元和十四年贈吏部尚書委
馬總備禮收葬恤其家

唐書本傳

明

殷尚質 天津衛人嘉靖十四年襲指揮僉事掌衛
事以勤能數被薦進都指揮僉事歷太原大同叅

天津府志

卷之二十七

人物忠臣

畧

將三十二年督軍解巡撫侯鉞圍擢遼東副總兵
就進署都僉事充總兵官三十五年十月打來孫
以十餘萬騎入廣寧尚質急設遊擊閻懋官等禦
之塔兒山寇先突懋官營不為動乃馳攻尚質殊
死戰力屈死之懋官馳救亦戰死事聞詔贈尚質
少保左都督諡忠愍廕子立祠

明史稿

按分省人物考尚質作尚賢

于廷陳 字惺涵鹽山人崇禎庚午科舉人任山西
猗氏縣知縣癸未冬渠寇臨城竭力守禦城垂陷
懸印於堂衣冠泣拜從容自縊

河間府志

何遜 字東閣興濟縣人甲子舉人甲戌副榜授
文水縣知縣時飛蝗入境遜令百姓預修撲具至
期畢集蝗竟撲滅是年大有人服其神明行取工
部虞衡司主事逆闖陷京師與子錫路死之同

國朝

王正志 靜海人明崇禎進士順治初以僉都御史
巡撫延綏軍政修明邊境又安姜瓖叛正志檄諸
將固守叅將王永疆開門延賊正志死之 贈左

都御史廕一子綬輔通志

周天命 天津人順治初為天津叅將土寇作亂率

天津府志

卷之二十七 人物忠臣

翌

兵赴勦力戰而死事平 贈卹廕其弟明命都司

經歷一綺志

李尚賢 慶雲人順治間土寇圍城尚賢突圍出赴

鹽山求援道遇賊被執給曰我能開門納眾賊信

之隨至城下尚賢大聲語城上人曰奉使無狀為

賊所執今死矣賊單弱諸君幸堅守無慮也賊怒

殺之同上

張三成 慶雲人順治五年寇變賊逼攻城成以大

義說之賊怒談笑受刃顏色不變河間府志

王顯謨 天津人為漳州府同知海寇陷城被執賊

其身露首餓死

通志

隋光啟 天津人由宗人府奉祀授江南松江府守

禦所陞湖廣永州府錦田衛守備康熙間夏包子

謀逆漢口光啟城守不去死於難奉

旨命地方官獲柩回籍

孝友

晉

刁 彝 字大倫協子 協傳詳忠臣 少遭家難王敦誅後

彝斬讐人黨以首祭父墓詣廷尉請罪朝廷特宥

天津府志

卷之二十七

人物孝友

巽

之由是知名歷尚書吏部郎吳國內史累遷北中

郎將徐兖二州刺史假節鎮廣陵卒於官子達字

伯道達弟暢字仲遠次子 字叔仁並歷顯職隆

安中達為廣州刺史領平越中郎將假節暢為始

興相 為冀州刺史 晉書本傳

後魏

高 諒 滄州人居喪以孝聞正光中加驍騎將軍

滄州志

唐

徐文亮 棧州人數世同居旌表門閭 唐書孝友傳序

劉君良 瀛州饒陽人四世同居族兄弟猶同產也
門內斗粟尺帛無所私隋大業末荒饑妻勸其異
居因易置庭樹烏鷄令鬪且鳴家人怪之妻曰天
下亂禽鳥不相容况人邪君良卽與兄弟別處月
餘密知其計因斥去妻曰爾破吾家召兄弟流涕
以告更復同居天下亂鄉人共依之衆築爲堡因
號義成堡武德中深州別駕楊和業至其居凡六
院共一庖子弟皆有禮節歎挹而去貞觀六年表

異門閭

唐書本傳

任敬臣

字希古棣州人五歲喪母哀毀天至七歲

天津府志

卷之二十七

人物孝友

三

問父英曰若何可以報母英曰揚名顯親可也乃
刻志從學汝南任處權見其文驚曰孔子稱顏回
之賢以爲弗如也吾非古人然見此兒信不可及
十六刺史崔樞欲舉秀才自以學未廣遜去又三
年卒業舉孝廉授著作局正字父亡數殞絕繼母
日而不勝喪謂孝可乎敬臣更進饘粥服除遷祕
書郎休沐闔門誦書監虞世南器其人歲終書上
考固辭召爲文館學士俄授越王府西閣祭酒
當代王再表留進朝請郎舉制科擢許王文學復
爲文館學士終太子舍人

唐書本傳

按計敏夫唐詩紀事以希古為名敬臣為字未知孰是

許法慎 滄州清池人甫三歲已有知時母病不飲

乳憐憐有憂色或以珍餌詭悅之輒不食還以進

母後親喪常廬於塋有甘露嘉禾靈芝木連理白

兔之詳天寶中表異其閭

唐書本傳

鄭士才孫楚信劉賢邊鳳舉 士才滄州人楚信及

賢清池人鳳舉渤海人皆事親居喪著至行者天

子俱旌表門閭賜粟帛州縣存問復賦役

唐書孝友傳序

按四人並載唐書孝友傳序滄州志作宋人誤

朱庭玉 清池人與弟庭金共割股以療親疾旌表

天津府志

卷之二十七

人物孝友

奕

門閭 唐書孝友傳序

按河間府志謂庭玉庭金兄弟數世同居人無間言與唐書原文不同今為釐正

後唐

張建立 滄州乾符人割股以治母病母卒割心瀝

血以祭辨髮跣足廬於墓所三十年

續文獻通考

宋

崔諒 滄州人七世同居郡守每延致之或親謁

其廬 滄州志

胡元興 滄州人母死負土成墳晝夜啼不絕聲州

郡以聞詔旌其門賜以粟帛

同上

金

榮楫 滄州人明昌二年出粟七百石錢三百貫

柴三千束賑饑民詔補以官仍正班叙

明

鄭海 天津左衛前所小旗以廬墓有感旌表其

門

張海 天津人性孝友母范氏死廬於墓側號泣

不離終三年始歸

倪維成 天津衛生員少孤事寡母陳氏備極孝養

學院霍某疏請旌表樹坊

天津府志

卷之二十七

人物 孝友

巽

梅應文 天津人弟應元任山東濟南府遊擊時值

流寇擾亂應文尋弟濟南為寇所執代弟而死

王紹慶 天津衛生員弟廷慶以非辜罹獄紹慶憫

其無嗣乞以身代苦歷三木後逢赦得免卒年七

十九

以上天津衛志

馬世琦 字寰珍慶雲人邑廩生剛毅有操守與人

無忤其中寬而有制和而不流性孝友幼失恃事

父孝養曲至及卒殯葬皆循古禮奉繼母朱同於

所生子孕秀授州同

慶雲縣志

王謨 鹽山人庠生忠肅公期後醇厚和平閉戶

讀書父死哀毀骨立幾不能生畢葬事廬墓三年
知縣陳準廉知延至公堂以鼓樂花幣導送歸兼
表其閭

趙獻廷 字效明鹽山庠生早失怙奉寡母祁氏備
極色養母病焚香割肉籲天請代母尋愈後五年
母卒殯葬如禮廬墓三年里黨稱之

路建邦 鹽山生員年五十父故寢處草土如禮朝
夕哭奠必盡哀終喪骨立如柴後母病篤永夜露
禱母病果瘥以上河間府志

李 治 滄州人苑馬寺監正親亡廬墓六年

天津府志

卷之二十七

人物 孝友

辛

李觀光 滄州人右通政以父亡廬墓三年運使邢
某扁曰孝子後廬母墓因致疾卒察院于某旌曰
純孝格天

孫 淪 滄州廩生孝事繼母友撫幼弟學院周穆
文張掛明倫堂

王 煥 滄州生員八表孀萱三釜承歡學院周穆
文張掛明倫堂

王 填 滄州生員性孝友有產悉讓於弟里人以
佛呼之後因母故哀毀過節未及服闋以疾終

子弟 滄州人廬墓孝子

呂世祚 滄州庠生以弟早故遺幼子希契六歲教
養成名弟所遺家產代為經理及長歸之纖毫不

遺學使袁鯨舉德行旌賞以上滄州志

劉其醇 字凝白慶雲人自幼嗜學稟質誠篤無少

長一以敬接之性最孝母張病祈禱減算及卒擗

踊長號絕而復甦父沒亦如之提學御史獎其孝

終邑庠廩生慶雲縣志

楊 圮 青縣人父先歿母亦繼卒葬畢就塚側略

成草舍終日茹素朝夕進香增土其塚遂高如邱

塚後有田數畝獨為耕斂衣食自給三年不受妻

天津府志

卷之二十七

人物 孝友

至

子之養

鄭惟儒 鹽山人事母劉氏孝母未食者不敢食母

卒哀毀過禮及葬乃穴處於墓者三年又於墓傍

種瓜以施路人以上畿輔通志

按鹽山縣志 惟儒作惟倫

孟 虎 慶雲人自幼孝友生元末歷年一百八歲

淄川高捷巡按河間聞之令縣以安車送至府問

元明間事言之甚悉加壽官命縣每年給穀二十

石歷八歲至成化初終今板槌營孟氏皆其後慶雲

縣志

向化 靜海人父上為衛指揮坐罪憤極投海死
化求屍不得亦投海忽上屍浮出衣服盡脫頂之
雷雨驟作化首頂父衣浮之一處眾皆駭異共收
葬之

呂詠 滄州庠生篤於孝行生養死葬備盡其道
事孀孀撫孤姪一體無間躬任捍禦孤城獨全抑
儒紳優免之請賦役維均滄人德之以上畿輔通志

胡蕃 字翼明慶雲人邑庠廩生性孝友痛父蚤
沒事母曲盡孝養兄弟同居家貧所得廩餼不以
自私盡給於弟奉母甘旨鄉閭重之慶雲縣志

天津府志

卷之二十七

人物 孝友

至

趙巡 鹽山縣人垂髫時父邦智為里長誣攀侵
糧逮獄拷比體無完膚初巡隨兄等避居樂陵閭
父受比瀕危挺然詣縣願以身代途遇母憐其幼
挽之南行巡與母訣曰兒不復求生矣至縣代父
出獄備嘗諸苦後遇赦獲免

張奉 青縣諸生性至孝父卒哀毀骨立祭葬以
禮廬於墓側三載以孝行旌門

按青縣志 奉作俸

劉孔安 青縣諸生自幼孝出天性年十八父病親
嘗湯藥及卒負土築墳廬墓三年

張清 青縣諸生父亡廬墓三年手植青楊成林
有烏鳥鳴其上行者惻然名爲孝鳥

竇文清 青縣諸生母張氏故躬自負土築墳廬於
墓側三年有慈烏馴繞之異

董嘉善董繼昌 靜海人俱諸生五世同居百口共
爨慈孝恭友之風溢於閭里

辛進孝 南皮人歲荒母久病乃割股以進母病旋
愈以上河間府志

張永吉 字還白謚曾孫父早歿時切哀慕事母極
孝遇物時非奉母不敢食教弟成立養妹終身督

天津府志

卷之二十七

人物孝友

五

學廉知嘉獎之以明經終

張耀 字燦然庠生以旃孫父搆痰疾朝夕侍奉

三年無怠家產悉舉以昇異母弟已雖貧弗一言
及之以上南皮縣志

劉仲仁 南皮人母死廬墓絕迹不入家室

王界 鹽山人母亡廬墓三年

王建極 鹽山人年十五歲父故廬墓三年

劉才盛 鹽山人母張氏孀居病思肉家貧不能得
割股啖之母病即愈

李懷瑜 鹽山人萬曆丙子舉人父炤卒哀毀盡禮

事母王氏備極歡養事寡嫂甚恭視孤姪猶子
魏孝廉

張 鎧 天津衛指揮張鏞之弟代兄死繫獄遇赦
得免

許汝謙 字六吉鹽山人性至孝能養親志有司三
旌其閭任齊東縣訓導公正自持不徇不屈陞學
正

某孝子 遺姓名青縣人萬 三十七年大水鄉民
乘船入市至城東北隅暴風船覆溺死者十八人
孝子已登岸見無其父號呼投水而死三日抱父

天津府志

卷之二十七

人物 孝友

齒

屍浮出而同舟俱死竟無識者

賈文清 青縣人性行醇篤居貧修志慕古力學母
故餽粥不入口憔悴骨立鄉大夫力勸節哀但唯
唯泣謝竟不變及葬廬於墓側三年間負土築墓
高若邱陵屆禫方歸

趙洪籙 字濛初鹽山人知縣書子天啟辛酉科舉
人少有文譽能四體書父病焚香籲天願以身代

士林重之 以上河間府志

黃正邦 號維新南皮人性穎異七歲就傅通大義
精書法見者以國器目之十三而孤家貧兩弟

母湯曰爾讀書固吾志然誰爲我謀朝夕因廢學躬耕以奉甘旨常將張公藝九世同居圖懸於堂顧諸弟曰天性所在勿謂古今人不相及也母歿共爨三十餘年終無間言子家棟崇禎庚午舉人孫得焜進士得煜壬子副榜

王世顯 南皮人事親孝親歿哀慕不已廬於墓側事聞兩院咸有粟帛之賜

吳推已 字恕我南皮人父巍然官廣文推已性至孝母疾篤七日不食籲天願以身代遂愈後母柩在及亂兵至衆皆逃匿推已哭於柩傍不去兵至

天津府志

卷之二十七

人物 孝友

五

欲焚之泣曰寧殺我勿焚母兵憐而釋之邑令福建林學會表其廬曰孝子之門子維哲順治辛卯科舉人

侯守正 字廷觀號平泉南皮人七歲喪母哀毀踰禮事兩繼母皆無間言迨父歿哀慟之聲不忍聞奉庶母爲慈親歿服齊衰三年撫異母兩少弟俱成名守正幼聰穎爲文奇麗年十四入太學所交悉名流卒業而歸以高隱終子楹楹傳詳儒林以上南皮縣志

國朝

陳奉勅 滄州人性至孝父歿隻身廬墓朝夕哭奠

三年不離墓側童叟見者皆為感泣事聞旌表

畿輔通志

白德崇 字伯修南皮庠生父養鈔廩生崇禎戊寅

北行羈蒙古二十載德崇日夜思慕順治戊戌聞

父入都步行五百里牽衣號泣哀感旁人貸金八

十贖回歸鄉鬻產償之父予得以完聚

南皮縣志

李震成 字霖玖滄州人工詩文善書家貧事親必

備甘脆友愛諸弟常共處一室田里悉讓之中明

崇禎壬午解元癸未登進士

國初授聞喜令全活香山堡民千餘戶旋以部郎督學

天津府志

卷之二十七

人物孝友

五

河南六年又備兵陝西漢中所至有聲

朱鼎 字象九滄州人明末諸生事親孝遺產悉

授諸弟已無取焉力耕自給流寇亂鼎罄家財募

壯士守城城賴以完有從兄嫂孀居子幼里中惡

少以事誣之將抵死鼎願以身代

國朝定鼎寃乃白

于一龍 滄州庠生性孝友遭兵變父母被傷死一

龍尋尸殮葬痛毀幾絕咸稱其孝有弟七人讓金

讓產有古人風歲大饑人相食施粥以食往來全

活者千餘人

孫登浚 滄州庠生年十三母郭故廬墓三年

志

王應命 字御圖滄州人明末諸生流寇亂應命與
郡人朱用錦劉慶蕃戴世德李人龍張文炳等修
城郭繕守備賊至以火器擊退之殺傷無算城邑
賴以保全從兄可進孤且貧為置產養之後又觸
法當死應命竭力解其獄妹適南皮被擄具金贖
還鄉里咸重其義

丁重新 慶雲人家貧力耕養親母卒負土築墳泣
血三年不茹葷飲酒

河間府志

天津府志

卷之二十七

人物孝友

五

劉芳範 字魯山鹽山人克敦孝友細行無失康熙
十年學使有齒德兼尊望重一時之獎

鹽山縣志

柴堪棟 南皮人邑諸生

父克振傳詳文苑

性至孝父母年

登九旬色養備至友愛庶弟以所應得產讓之女
適郭早孀撫周歲兒內患外侮無不備嘗棟極力
保全得全苦節遇事尤慷慨見義必為鄉里所倚
重以子廷望貴 贈吏部考功郎中康熙三十八

年祀鄉賢

通志

高恒懋 字勵昌號乾甫少保爾儼

傳詳名臣

子總角即

善屬文侍少保

世祖諭公卿子入侍將備輔弼方面之選少保以姪恒豫
失恃撫若已出恒懋承父志遂以恒豫應焉辛卯
恒懋舉鄉薦少保卒

朝廷恩廕一子恒懋復讓恒豫已卯恒懋舉進士以祖
老須養遂改大寧教授終奉天教授

靜海縣志

祝昌齡 字禹寰滄州人前尚寶卿祥嗣孫性孝友
七歲遭父喪哀毀盡禮水漿不入口者累日事母
以養志聞處鄉邦有大度犯而不校時咸以婁師
德目之薦紳士皆樂與之遊州守常過而諮詢焉
後以壽終進士李震成銘其墓

滄州志

天津府志

卷之二十七

人物孝友

五

傅廷俊 字越千滄州人事後母以孝著家貧日一
炊冬以木棉子煖足夜無燈取綫香映讀而母甘
旨無缺母時有譴責一夕病篤夢神語曰地下守
藥鐺者汝孝子也由是待廷俊異他日廷俊中康
熙己亥進士授金鄉令遷御史獄無冤民出視河
東鹽政商竈蒙其惠宦成盡以貲贍其後母弟鄉
里稱其友愛

况名世 字碩輔滄州人以恩貢考授縣丞性純孝
八歲父在外病輒驚泣告其母越次日而耗至母
沒以哀毀聞後母弟經世遇賊將見殺并及後母

名世泣以身代不許號呼隨之聲動左右賊驚散
妻郭氏早卒終身不娶有孀婦年八十無所歸名
世遇諸塗卽留養之年及百齡而卒

李

瑤

字可菴震成少子居父喪盡禮事母無一

日離膝下常繪名勝圖以博色笑母沒號泣不絕
聲未葬火發于室瑤伏棺上鬚髮盡燎賴衆救至
得免踰年以廢疾卒子五人之擘之擘成進士之
崐之巍舉於鄉之嵩諸生時以爲純孝之報

一

劉駟良

字逸魯滄州諸生編修雯曠子也九歲執

父喪如成人事兄若嚴師母以爲懼兄也詰之對

天津府志

卷之二十七

人物 孝友

堯

曰大人見背惟兄是賴兒實敬之不知其懼事母
雖菽水非自滌器不敢進授室後常臥母足下嬉
戲如小兒時母沒死而甦者數四子濤雍正癸卯
舉人令交城今爲榆次令

程

英

滄州人少孤爲州小吏以養母母沒英行

役未歸聞之慟幾死旣葬卽日寢食棺側鑿穴而
居負土成祖父二冢疏食不繼採栢葉爲食期年
妻子勸之歸英拔刀自刎血沾衣急救得免仍自
瀝血負土三年無敢促其歸者州人感其孝饋以
薪米英於糊口外槩不受冢在城南數里今稱程

孝子廬墓處

于三友 滄州歲貢生事嫡母踰於所生四歲父食以桃三友竟日不食以奉母十三補諸生同郡先輩咸器之父沒朝夕泣奠墓下三年如一日兄弟七人庭無間言居二母喪哀毀如父歿時因是致疾卒鄰里僕姬感其孝咸為流涕三友薄於自奉厚於施與御下惟以德化有僕嘗拾遺金即日覓失者還之曰非不愛金恐無以對主人子沂雍正癸卯舉人

徐世祿 滄州人幼以孝著弱冠喪妻不再娶母沒

天津府志

卷之二十七

人物 孝友

卒

哀毀幾滅性賣履以養父數年父又沒負土成冢築土室於塚側寢食不去凡三年歸悉以家計付弟鄧兒而自隱於河西朝陽菴年七十餘無病逝本州貢生張淳具棺葬之

胡金誠 滄州人母病急金誠年十六割左臂肉以進遂愈母年八十餘至今猶在

李 度 滄州人後母梁氏以節著父歿力耕以養母兄為中表藍氏所殺度晝夜號泣思復讐久之藍犯法至解州度追及之藍踰垣得免從弟植析居既久招與同爨里人不知以為同懷也年四十

無子以百金置一妾甫入門察其色非處子婉語
邛之不言怒叱之始知其有夫也卽夕告諸官召
其夫而還之不索其直次年生子昌基又次年生
盛基昌基雍正甲辰舉人盛基州諸生

樊世翼 滄州諸生兄世鞏客都下有言其病者急
往求之則已死遍求其骨不得晝夜號泣形於夢
寐遂得兄客死狀及埋葬所東城指揮章廷圻憐
其友愛爲之發冢貌如平生世翼一慟而絕及蘇
乃枯骨耳負以歸育其遺女愛踰已生數年女又
殤世翼爲文弔之詞甚悽愴

天津府志

卷之二十七

人物
孝友

空

劉若鼐

字蓮友滄州監生大理寺少卿若鼐弟

若鼐

傳詳
名臣

事親色養無違若鼐歷官中外囊無一錢鼐

破產給之無難色弟若弼病瘋資養之數十年室
雖屢空不計也卒年七十一

一張

甫

南皮監生父某性忼爽不問生產家計日

落莆竭力事之不匱於供以承父志繼母宋邁疾
醫勿瘳偶思食林檎時沍寒不可得甫號泣求之
適同邑王氏林檎一樹方冬結實甫得以進噉之
遂瘥人咸爲孝感所致生平樂施無德色鄉黨中
待以舉火者無算負其金貧不能償折券還之董

村楊寬家貧父死不能葬畀以地一區羈旅無歸者必代謀生計并資以多金遇老而失所者必留養歿則經理其喪寡媪撫一子貧不能自存甫割地三十畝以贍之好義不倦蓋出於天性合邑稱之

陳森 字如千慶雲諸生學問淵博工楷隸書父患瘡甚危森晝訪名醫夜奉湯藥四十餘晝夜未嘗安枕後森染重疾舉家皆懼夜夢神人持藥醫之狀如樹根中有白汁教以鼻吸其氣次日疾果瘥父沒哀毀骨立水漿不入口者數日三年不宿

天津府志

卷之二十七

人物 孝友

空

於內人罕見其齒邑令程均嘉之復遇母喪三年內屏子孫童僕獨居柩室服闋柩移謂其子曰汝祖母柩移予心轉覺無所憑依矣合邑胥稱孝子

云 慶雲 縣志

馮經世 字抒平慶雲人秉性淡薄樂善好施少失怙事母備極色養母病輒焚香默祝願減已壽以益母孝聲遠播邑令旌其門曰德重鄉評

賈生才 慶雲人年十八失怙奉養孀母不忍一日離後母年邁病篤才焚香籲天願減已壽以益母病果愈邑令聞之表其門曰行同躍鯉

劉元宰 字襄哉號拙庵慶雲人鄉諡恭毅先生其醇第三子早孤事母孝十三歲值兵變有人自城上擠之下竟無恙若有隱相者爲父其醇卜地合葬且行且哭道路爲之感動遇諱辰或思慕涕泣雖耄年不輟慶邑學宮每爲修葺作邑中八景詩天津兵備道薛柱斗一見欣賞依韻和之馳驛送下並載邑誌兩與鄉飲介賓壽九十七歲子孫同堂五世文武鄉科蟬聯不替人皆以爲世德之報云

天津府志

卷之二十七

人物 孝友

奎

劉奇 字子易號敬齋慶雲人爲人澹泊寡營讀書明大義制事小心就武科有儒雅風母病禱於神願以身代後以親老不樂仕進壽九十二舉鄉飲大賓

陳旃 字提顯慶雲人少失恃父教甚嚴委曲承順卒得歡心父沒析產田宅器用任弟自取絕不相較里有爲不善者相戒爲旃所知好讀書學問淵博尤工書法年八十餘以明經終

以上慶雲縣續志

邢琰 字芸圃天津人中康熙庚子舉人天性孝友父客都下琰授徒奉母束修所入悉供甘旨母病晝夜侍牀簣衣不解經蟣蝨盡生瀕危琰百計

營療爲不食者累日沒之日撫棺長號遂咯血不止旬月竟以哀毀死弔其廬者見淚跡血痕交漬
繆幕之上無不哀之稱曰真孝廉

天津府志卷之二十七終

天津府志

卷之二十七

人物
孝友

六